

TEZAUUR LITURGIC
24 SEPTEMBRIE

ACATISTUL
SF. CUVIOS
NICANDRU
DE LA PSKOV



MOSCOVA, 2000



Акафист

святому преподобному

Никандру, Псковскому

чудотворцу

Кондак 1

Возбранный от Начальника и Совершителя веры, Господа Иисуса, данный во образ последования Православныя Церкви сословию, доблественный подвижнике и чудотворче предивный, преподобне отче Никандре! Похвальная со благодарением приносим ти молитвенницы твои: ибо теплым твоим предстательством у Царя Небеснаго вся полезная и спасительная ходатайствуеши нам. Яко имея дерзновение ко Престолу Благодати, от всяких нас злоключений свободи, да зовем ти:

Радуйся, преблаженне Никандре, преподобне отче наш.

Икос 1

Ангельскими девяточисленными силами
окужаемый славы Господь, предъведев
неуклонное сердца твоего изволение, яко
хощеши быти покоривым учеником и тщаливым
исполнителем заповедей Его, вдохну тебе, якоже
древле пророчице Анне, еже прибегати ко храму
Господню, да научишися тамо началом
премудрости, яже есть страх Господень: темже и
научи нас со удивлением воспевати тебе
таковая:

Радуйся, благочестиваго корене благое
прозябение.

Радуйся, чудное всех христианских
добродетелей плодоприношение.

Радуйся, младенче, при купели обновления
посвятивый себе Господу на служения верная.

Радуйся, помазанниче, восприемый свыше
всеоружия духовная.

Радуйся, теми от юности на тело свое, на мир
сей и диавола себе ополчивый.

Радуйся, разум свой ко свету боговедения
восперивый.

Радуйся, очима твоима всюду Господа
искавый и в нем намерение полагавый.

Радуйся, слухи твоя на восприятие глаголов
Божиих, имиже возраждается вера, обративый.

Радуйся, уста твоя на славословие Божие и
псалмопение, на назидание искреннему твоему
в душеполезнем отверзаяй.

Радуйся, руце твои на творение благодеяния
требующим устрояй.

Радуйся, нозе твои шествовати по путем
оправданий Господних управляй.

Радуйся, вся твоя душевная и телесная
чувства на благоугождение Подателю всех благ
устремляй.

Радуйся, преблаженне Никандре, преподобне
отче наш.

Кондак 2

Видя преподобный Никандр душевными
очима, яко в мире сем всяческая суета, и яко
недостойны суть страсти нынешняго века,
имущей славе явиться на небесех, потщался,
отвергся себе, мира и яже в нем, наставляемь
преподобным Евфросином и Саввою, тесным и
прискорбным шествовати путем в горний

Небесный Иерусалим, егоже достигнув ныне, предстоя Престолу Агнчу, достойно веселится с ними и со всеми избранными, поя Всесильному Богу: Аллилуиа.

Икос 2

Разумев Господь, напоивый тя, преподобне, словесным и нелестным млеком благочестия, сподоби тя преспевати в мужа, в меру возраста совершенна, возрастающа во спасение, да вкусиши, яко благ Господь: к Немуже приходя, сам яко камение живо зиждешися в храм духовен, в святительство свято, возносити жертвы духовныя благоприятны Богови; и да благоуспеши в сем. Удалився от дому твоего, вдал еси себе мужу богобоязливу, навикнути от него, яже суть на потребу: уведети Писания, в нихже сокровен есть живот вечный, и да научиши нас приглашати тебе таковая:

Радуйся, юноше, вся детская игралища, яко поползновение ко злу, презревай.

Радуйся, мудрованием горних, а не земных, яко многоценным бисером, сиявай.

Радуйся, оным лице твое и сердце украсивый.

Радуйся, Господа от всея души и всея крепости твоея возлюбивый.

Радуйся, не точию день субботный, но и вся дни живота Господу Богу святивый.

Радуйся, николиже имене Господа Бога твоего всуе приемый.

Радуйся, родителей твоих любовию, послушанием и воздаянием должным почтивый.

Радуйся, ближняго твоего, яко себе самага возлюбивый.

Радуйся, юность твою в целомудрии обучивый.

Радуйся, яко деву чисту, Жениху Христу себе обручивый.

Радуйся, писанная в законе благодатию Божию сотворивый, и в усовершение сего еще едино dokonчавый.

Радуйся, вся имения твоя продавый, и да живот вечный наследиси, нищым раздавый.

Радуйся, преблаженне Никандре, преподобне отче наш.

Кондак 3

Сила божественнаго евангельскаго слова: «Приидите ко Мне вси труждающися и обремененнии, и Аз упокою вы», подобно мечу обоюду остру, проникну твое, преблаженне, ревностное сердце, бывшу тебе со благоговением во святем храме: егоже действия толико исполнен был еси, яко ничесому запинаящу, паче же путь тебе показующему Божиим изволением мужу Феодору, прострый дух твой, яко горлица в пустыню непроходимую водворился еси, и тамо воздвигнув некое жилище, себе самаго представил еси селение Богу Вышнему, поя Ему в подвизах молитвы и пощения всегда: Аллилуиа.

Икос 3

Имея основание богоугоднаго жития твоего, преблаженне отче наш, смирение, кротость и нетщеславие, да отец твой, видя в тайне, воздаст тебе яве, мнил еси места пустынная быти сокровение твоя добродетели. Но якоже речеса: «Несть глас, иже не услышится»; тако и святое житие твое прославися во окрестных странах. И да не како пакостник плоти, аггел сатанин, препнет твоему шествию, и да не

искусит тя похвалиться о сем: сего ради оставив место пребывания твоего, Богу лучшее что о тебе предзревшу, притекл еси во обитель святого Иоанна Богослова, и откровенным гласом пред церковию и ангелами изрек священныя обеты, вдал еси себе во служение иноческое. Темже воспеваети ты таковая:

Радуйся, воине, не двема господинома работати, но Единому точию, Живущему на Небесех, восхотевый.

Радуйся, вся повеленная чрез начальников поставленных от Него с радостию, а не с въздыханием творивый.

Радуйся, понесый терпеливдушно и самая великая озлобления.

Радуйся, плоть твою воующую на духа умертвивый чрез молитву и суровая пощения.

Радуйся, уединенно в богомыслии и слезах нощи проводивый.

Радуйся, тело твое, во умерщвление страстей, на снедение летающим животным обнаживый.

Радуйся, кровью мученическими во свидетельство непреложныя веры обогранный.

Радуйся, по распятии ветхаго Адама, новым,
Иже есть Христос, в преподобии и правде
оживотворенный.

Радуйся, крестивыйся во Христа.

Радуйся, одевыйся во вся велелепоты Его.

Радуйся, хлеба ангельскаго во дворех
Вышняго Сиона вкушая.

Радуйся, глаголом Божиим на труды
многообразныя себе укрепляя.

Радуйся, преблаженне Никандре, преподобне
отче наш.

Кондак 4

Буря смущения, воздвигаемая ветры
многообразных о преподобнем житии твоём
помышлений, пребывающих с тобою во
общежительстве, колеблет корабль смирения
твоего. Ты же, смирения рачителю, паче и паче
исполняясь оным, грядеши паки в пустыню,
юже ти указа глас Невидимаго от олтаря
исходяй, да тамо на вящшыя подвиги,
препоясався силою свыше, обратишися,
попирая силою Креста вся сопротивнаго козни,
да тако соплет победоносный венец,
удостоишися прияти на главу твою от руки

Господа, всегда победители нас Творящаго, поя
Ему: Аллилуиа.

Икос 4

Сушу ти на месте, великий подвижнице,
идеже бе устроено жилище твое, Богу тако
действующу, течение твое совершал еси в
теплых молитвах, во уповании несомнительнем,
яко не изнеможет от Бога всяк глагол, и в
любви, от неяже ни ранами, ни прещением, ни
гладом, ни иною коею нуждею отвлечен быти
возмогл еси: обаче диавол, яко лев, иский кого
поглотити, наустити безчеловечныя разбойники,
еже предати тя гублению, но ничтоже возможно.
Паче же прославися твое неизреченное
терпение: егда бо от язвы копием в ребра весь
обагрен был еси кровию, тогда возопил еси в
души твоей, якоже Стефан: «Отче, отпусти им!»
Мы же зряще твое крепкое благодушие, со
удивлением вопием ти таковая:

Радуйся, страдальче, посвятивый в жертву
приятну Богу себе самаго.

Радуйся, не убоявыйся от убивающих тело,
души же не могущих убить.

Радуйся, каменю непоколебимый, от негоже вся волны свирепствующие сокрушаются.

Радуйся, яко в тебе вера, любви, смирение и незлобие являются.

Радуйся, мужу скорбей, радуяйся со святым Павлом во страданиях своих.

Радуйся, приемляй радость, веселие и мзду многу на небесех.

Радуйся, кровию твоею, яко гласом вопиющим на небо, оных ослеплением очес и потоплением поразивый.

Радуйся, тоюжде кровию оных на путь истинный раскаяния обративый.

Радуйся, пришедшим им к тебе не грозныя и местныя взоры явивый.

Радуйся, яко отец сердоболный развращенных чад не оскорбивый.

Радуйся, изливанием крове твоея венчавыйся с мученики и страстотерпцы.

Радуйся, не точию всех притекающих к тебе с верою, но и о вразех твоих теплый молитвенниче.

Радуйся, преблаженне Никандре, преподобне отче наш.

Кондак 5

Боготечная звезда, заимствующая свет свой от истинного солнца правды, Господа Иисуса, явился еси нам, богоблаженне Никандре, во мрачней нощи многострадального жития сего спящим и заблуждающим, показуй нам первее время востания от сна греховного: таже благовидным образом своим, словом, житием, любовью, духом, верою, чистотою, кротостию и терпением, ведый по пути спасения к горнему Небесному Отечеству всех прибегающих к тебе и вопиющих Богу: Аллилуиа.

Икос 5

Видевше Православныя Церкви благочестивая чада, паче же окрестнии, ревностное твое по заповедем Господним житие, и благодать Духа Святаго обитающую в сердцы твоём, еюже умудрився во спасение, преподавал еси послушающим тя отеческая наказания, и еюже врачевал еси не токмо недуги душевныя, но и телесныя, притекаху к тебе с верою не возвращающиеся тщи, но якоже облацы

поднебеснии исполнени влаги, орошаху нивы
сердец своих, возвращающе благия плоды веры
и вопиюще таковая:

Радуйся, источниче, посреде безводных мест
источаяй сладкия воды полезных учений.

Радуйся, наставниче предобрый в надежди
требующих о Божии милосердии уверений.

Радуйся, древо благосеннолиственное,
успокающее прохладою и утешением во юдоли
сей странствующих.

Радуйся, совершенными плодами онаго
насыщающее правды Христовы алчущих.

Радуйся, мироварнице, на вся недуги
врачевания содержащая.

Радуйся, оная, яко врач скоромиловитый,
безмездно недугующим подаваяй.

Радуйся, милости превеликия и скорбящим
скоропредстательнаго сострадания хранилище.

Радуйся, неповинных разрешение и
осужденных праведное судилище.

Радуйся, потщавыйся о нищете духовней и
тою вселивый внутрь тебе Царствие Божие.

Радуйся, прилежавый неослабно чистоте душевной и телесней, и тою же зряй Бога.

Радуйся, светильниче, елеем дарований Духа Святаго возжженный.

Радуйся, на высоко место славы небесныя вознесенный.

Радуйся, преблаженне Никандре, преподобне отче наш.

Кондак 6

Проповедуют безмолвныя пустыни, обители, гради и веси безстрастное житие твое, еже стяжал еси, богомудре, первее умертвив плоть твою бдением, пощением, стоянием на молитвословиих, ниже возлеганием на ребра, точию преклонением главы и малым дреманием. Противу же диавольских наваждений и полчищ его, овогда во всадники на конех, с тимпаны и кличами, овогда в лютых волков и дивиих зверей преображавшихся, вооружался еси: овых поражением жезла, овых силою Креста, и сим, яко великий Константин, побеждал еси. О Немже хваляся, яко оружию непобедимем, поещи Распятому на Нем всегда: Аллилуиа.

Икос 6

Возсиял еси царству Православно-Российскому под леты великий светильник, поставленный не под спудом, но на свещнице, исполнен ея чиста веры, надежды и любви к Сотворшему тя, паче же христианскаго терпения, незлобия и чуднаго воздержания от брашен, да явиши всем любовь чтущим тя, яко не о хлебе едином жив будет человек, но о всяком глаголе, исходящем из уст Божиих. Темже и мы, покрываемии тмою грехопадений, алчущии и жаждущии духом, взирающе на тя, радостная приглашаем ти тако:

Радуйся, воине Христа Бога нашего избранный, пребываяй Ему верен даже до смерти.

Радуйся, во брани жития невидимых врагов мужественне победивый.

Радуйся, во служении твоём, яко течец скорый, не возвративыйся вспять.

Радуйся, семя слова Божия не на сердце каменно, но на сердце плотяно приемый.

Радуйся, произрастивый благия плоды, с нимиже явился мирови.

Радуйся, яко теми мир прославляет Отца,
Иже есть на Небесех.

Радуйся, надежду твою и в жизни и в смерти
возложивый на Господа Едина.

Радуйся, тою покоривый вся тебе
сопротивная.

Радуйся, оною, яко непобедимым щитом, себе
оградивый.

Радуйся, любовью твоею неразлучно себе
Жениху Христу уневестивый.

Радуйся, тою всех блаженств, ихже стяжа
кровию своею, присно наслаждайся.

Радуйся, яко седением Христа одесную Бога
и ходатайством Его вопил еси в сердца твоем:
«Авва Отче!»

Радуйся, преблаженне Никандре, преподобне
отче наш.

Кондак 7

Хотящу некоему богобоязливу мужу Симеону
прийти поклониться тебе и насытитися
сладостных учений твоих, имиже возмогл бы
укрепити душу свою, яковая и улучил есть. Но
ты, прозорливче, предрекл еси ему

скороприближающуюся кончину и предуготовал еси его к мирному отшествию из сея плачевныя юдоли в вечную нескончаемую жизнь: чесо ради приим иноческий образ, устремил душу свою горе, и добре пожив, скончав и преселился во блаженныя недра Авраамова; о чесом ты прославляя Бога, поеши благодарственная: Аллилуиа.

Икос 7

Новаго тв пророка яви дивный в высоких Господь, разделяяй коемуждо дарования Святаго Духа, даровав тебе силу прозорливости: благородну бо некоему мужу Петру, заматоревшу во днех своих с женою и безчадну, чудесно приведенному к тебе, предрек еси, яко имать родитися сын ему, и яко воздвигнется на месте безмолвия твоего храм Пресвятыя Богоматере, и распространится место сие и прославится, еже и сбытся, чесовому удивляющесе, вопием ти:

Радуйся, мужу проречений, исполнением дела увенчанных.

Радуйся, будущая яко настоящая благодатию Божию созерцай.

Радуйся, благогласная труба, еюже
воздвизаются сердца земнородных унылая.

Радуйся, духовная скрижаль, на нейже
изображена суть предсказания неложная.

Радуйся, иноков пустынножительных
наставниче и основателю.

Радуйся, молитвами твоими обители чудныя
распространителю.

Радуйся, оскудения монастырская обильне
исполнимый и от хищников чудесне защитивый.

Радуйся, добре стадо тобою собранное ко
спасению наставляяй.

Радуйся, образе нищеты духовныя
благовидный.

Радуйся, вся мира сего красная, яко
скороисчезающая, Бога ради презревай.

Радуйся, многия люди от пути греховнаго ко
Господу обративый и спасый.

Радуйся, призывающих тя утешений
духовных исполняяй.

Радуйся, преблаженне Никандре, преподобне
отче наш.

Кондак 8

Странное видение и слышание не пленяющим разума в послушании веры и не покаряющимся истине является быти сие, яко овогда чрез сонное видение, простертием руки твоея, овогда чрез глагол приветлив, овогда чрез различная знамения, расслабленным, болящим, недугующим совершенное подаеши исцеление: мы же верую пленяеми, яко Богу вся возможна суть, и «веруй в Мя, дела, — якоже рече Христос, — яже Аз творю, больша сих сотворит», прославляем в тебе Чудотворящаго Бога. Тебе же исповедающе достойным всемогущества Его орудием быти, велегласно вопием: Аллилуиа.

Икос 8

Весь быв предан Богу: разумом — яко помышляти о Нем, волею — яко творити угодная Ему, памятью — приводя себе необъемлемое присносущие Его, вся назирающее и вся ведущее, представил еси Тому и тело твое, измождив и очистив е бдением, пощением и чудным воздержанием, да сподобишия быти селение Богу Вышнему, да пребудеши во Христе, и Той в тебе. Сего ради во время Святаго Поста притекал еси в Демянскую

обитель, и в совершение всех твоих добродетелей, наслаждался еси трапезы Господни, вкушая со благоговением и веселием Тело и Кровь Иисуса Христа. Мы же взирающе на тя, любезно вопием ти:

Радуйся, истинный учениче Христов, Егоже желанием возжелел еси исполнити волю.

Радуйся, шествовавый от веры в веру, от славы в славу.

Радуйся, приснотекущаго живодательнаго источника сладостей насладивыйся.

Радуйся, вкушением брашна негиблящаго, вечнаго, предвкусивый небесная блаженства.

Радуйся, удостоивыйся непостижимаго таинства, на неже приникнути ангели желают, общник быти.

Радуйся, чрез соединение сие призванный со Христом в Царстве Славы жити.

Радуйся, человеке исполненный богомыслия и презревый вся земная.

Радуйся, во отвращение еже не видети суеты, главу и лице схимою покрывый.

Радуйся, о времени кончины твоея, еже от человек никтоже весть, предвозвестивый.

Радуйся, по некоем недузе малем крестообразно руце к персем сложивый.

Радуйся, дух твой с веселием в руце Господни предавый.

Радуйся, житие земное божественным гласом: «Благословен Бог, сице благоволивый, слава Тебе», запечатлевый.

Радуйся, преблаженне Никандре, преподобне отче наш.

Кондак 9

Всякому естеству человеческому и ангельскому достоит дивитися великим от страны твоея подвигом и чудному свыше тебе дарованию: толико бо поработил еси плоть духови, яко на земли невещественное, равноангельное житие показал еси, и живя духом, духом и ходил еси, и во плоти аки безплотен явился еси. Сего ради многих чудес творения от Господа прием, чистою и богоприятною душею, благодатию того, ко избранным причтен еси небесным силам в нескончаемем Царствии, идеже поеши Всесильному Богу: Аллилуиа.

Икос 9

Витий многовещанных язык недоумет тя, достойный всякия славы, славне преподобне отче Никандре, по достоянию восхвалити и благолепно прославити паче-естественная дела твоя, яже творил еси на земли во плоти сущу ти. Но и по преставлении твоём в вечное Царство Славы, идеже ныне по трудех и подвизах сладостно почиваеши, многая и преславная чудеса творити нам не престаеши: честная бо рака, идеже почивают святыя твоя мощи, есть подобна Силоаму, отнудуже хромии, слепии, недужнии и расслабленнии здравие улучают. Мы же, имуще таковое безценное сокровище, благодарствием убеждаеми, воспеваем тако:

Радуйся, земный ангеле и небесный человекче.

Радуйся, во плоти живой духовно, в мире премирно.

Радуйся, честное носило и похваление Святыя Троицы.

Радуйся, тричастное души твоя посвятивый Единому Господу.

Радуйся, крилома разума возлетевый к Трисолнечному Свету.

Радуйся, волею твоею потщавыйся святити себе, якоже свят Господь Бог наш.

Радуйся, имеяй попечение не себе точию, но и всем блаженства достигнути.

Радуйся, исполненный мира и любви Божия, имиже ко всем миролюбив и братолюбив был еси.

Радуйся, осеняемый духом благодатей, и притекающих к тебе во спасение умудряяй.

Радуйся, в раскаяние пришедших милосердием Божиим утешаяй.

Радуйся, пред лицом Божиим, яко раб пред Господем, ходивый.

Радуйся, подвижнице, тако текий, яко достигл еси венца твоего, егоже и нас улучшить сподоби.

Радуйся, преблаженне Никандре, преподобне отче наш.

Кондак 10

Спасение хотя улучшить души твоей, преподобне, от юности твоея, даже до кончины, шествовал еси путем узким и прискорбным, взем крест на рамо, ведый, яко широкий и

пространный путь есть вводяй в пагубу. Темже аще и терние, и непроходимая места, и злая приключения запинаху тебе: обаче, предшествующу тебе верному Вождю и Поборнику Иисусу, достигл еси во дворы небесныя, идеже радостей неизглаголаных, яже око не виде, и ухо не слыша, и на сердце человеку не взыдоша, наслаждаяся, вопиеша Богу: Аллилуиа.

Икос 10

Стена неборимая еси всем земнородным, ко скорому твоему заступлению и предстательству притекающим, преблаженне отче Никандре! Темже и нам ко святым мощам твоим, невидимыми ангелами стрегомым, с верою приходящим, и милостивыя коемуждо по потребе помощи просящим, буди стена крепкая и оплот нерушимый, от всяких нас бед застеняя и ограждая, за еже мы вопием тебе таковая:

Радуйся, быстрый предстателю, приемляй прошения наша и на жертвенник благоутробия Божия возносяй.

Радуйся, коегождо прошения в их пользу исполняй.

Радуйся, скорое услышание нищих.

Радуйся, сердобольный судие вдовиц и отче сирых.

Радуйся, озлобляемых неповинно ревностный защитителю.

Радуйся, болящих душею и телом безмездный исцелителю.

Радуйся, пище и отрадо алчущих и жаждущих.

Радуйся, согреяние во мразех сущих.

Радуйся, обуреваемых немятежное пристанище.

Радуйся, добрый кормчию, жития сего корабль управляяй.

Радуйся, оскудения обители твоея богатне исполнивый.

Радуйся, храмы святыя и здания, сненныя огнем, согреянием сердец благоговеющих благолепне обновивый.

Радуйся, преблаженне Никандре, преподобне отче наш.

Кондак 11

Пению всякому земнородных достоит умолкнуть в прославлении превышающих силы человеческия трудов твоих, имиже добре потрудился еси в пустыни, воздѣлывая ниву сердца твоего ко духовному плодоношению. Кто бо от человек возвеличит суровое житие твое, кто прославит мужественныя подвиги твоя, безмолвие совершенное, смирение, незлобие, нищету духовную, пост многодневный, молитву непрестанную, чистоту по внутреннему и внешнему человеку, за няже сподобился еси со всеми без порока последующими Агнцу, во преподобии и правде пожившими, пети: Аллилуиа.

Икос 11

Светозарное светило явился еси не точию во странах Новаграда и Пскова, но и всю богоспасаемую Россию освещаеши златовидными лучами твоего пустыннаго и богоугоднаго жития, преподобне, и обильными водами, от цельбоносных мощей твоих, напаяеши всех верных, вопиющих к тебе таковая:

Радуйся, исповедавый Христа Иисуса словом и делом пред человеки.

Радуйся, яко в воздаяние за сия, исповедан еси от Него пред ангелы Божиими во веки.

Радуйся, благий делателю винограда Христова, понесый тяготу дне и вар.

Радуйся, плоды трудов твоих, яко первородное, принесый Господу в дар.

Радуйся, миром слез твоих в вере помазавый нозе Иисуса.

Радуйся, яко, идеже глас Евангелский проникает, возвещается имя твое.

Радуйся, тело твое уготовавый в жилище Духу Святому.

Радуйся, и по смерти, действовати Емуже в нем людем на пользу, удостоивыйся.

Радуйся, яко мощей твоих демонския силы трепещут.

Радуйся, яко мощи твоя коемуждо в приключившихся печалех увеселение источают.

Радуйся, востекий на небеса душею, яко Илия Елиссееви же оставивый милоть, ты же нам мощи твоя.

Радуйся, яко силою их, якоже той милотию разделяше воды, мы, лобызающе я, разделяем воды скорбей и шествуем по суши исполнения желаний во благих.

Радуйся, преблаженне Никандре, преподобне отче наш.

Кондак 12

Благодать, данную преподобному Сергию, проповедаше иногда великий князь Димитрий с вои своими, егда той молитвою его и помощью двух монахов, данных ему от него, нечестивых агарян победил есть. Равно и мы благодать твою проповедуем, егда, облажащу Псков злочестивому Баторию с полчищи своими, провел еси молитвою твоею жителей страны сея безвредных посреде огня и меча, шедших со освященным собором на погребение твоего тела: отунудуже почерпающе надежду, избавлятися и всякой стране чтущей тя от нашествия иноплеменных твоим заступлением, вопием Богу: Аллилуиа.

Икос 12

Поюще благоговейно пустынночестивыя
подвиги твоя, угодниче Божий Никандре,

имиже достигл еси безсмертныя славы на небесех, и вечное твое успение в смерти, прославляем сердцем и устнами Бога всякаго утешения и щедрот, Даровавшего нам тебе, такового мужественнаго подвижника на невидимых врагов в последование, и такового милостиваго отца, иже и по преставлении своем нас не оставляеши, но обильными чудес водами всегда напаяеши, очищаеши и прохлаждаеши. Темже надгробную совершающе песнь, ублажаем достопамятное житие твое любезным воспоминанием и усердным целованием:

Радуйся, человеце Божий, девятию блаженствы евангельскими украшенный.

Радуйся, во светение чудесное Церкви Православней на высоте поставленный.

Радуйся, уподобивыйся Онуфрию и Сергию великим, подражая житием в пустыни.

Радуйся, Александру Свирскому, явльшемуся ти сугубо на укрепление противу нападений бесовских, последовавый во святыни.

Радуйся, Моисею Боговидцу поревновавый в презрении временных сладостей.

Радуйся, поношение Христово вменивый большее богатство, паче всех сокровищ, взирая на мздовоздаяние небесных радостей.

Радуйся, мир имевый и святыню со всеми, ихже ради зриши Бога.

Радуйся, по степенем добродетелей приступивый ко граду Бога Живаго, ко Иерусалиму Небесному.

Радуйся, отгуду ходатайством твоим ниспосылай вся нам благая временная и вечная.

Радуйся, победителю видимых и невидимых врагов, сотворенный столпом в Церкви, на немже написано имя Божие.

Радуйся, умерый мирови жив же Богови, мертвым душею даруяй жити.

Радуйся, живой во веки во Царствии Небеснем со Христом, с Нимже и нам моли быти.

Радуйся, преблаженне Никандре, преподобне отче наш.

Кондак 13

О преблаженне, преподобне, великий чудотворче Никандре, милостивейший во днех наших покровителю и отче! Нынешнее прими от сердца, подобающее тебе, приносимое моление, и твоим непостыдным ходатайством у Небеснаго Царя испроси: страждущую страну Российскую Христос Бог от лютых безбожников и власти их да свободит, и да возставит престол православных правителей; верных рабов Его, в скорби и печали день и ночь вопиющих к Нему, многоболезный вопль да услышит и да изведет от погибели живот наш, от враг видимых и невидимых, от всяких бед, напастей и скорбей, и исходатайствуй всем, усердно призывающим тя, прочее время живота в мире и истинном покаянии скончавше, в Небесном Царствии с тобою пети во веки: Аллилуиа.

Этот кондак читается трижды, затем икос 1-й и кондак 1-й

Молитва

О преподобне и достоблаженне отче наш Никандре, постниче терпеливодушный, безмолвия рачителю предоблий, учителю духовный спастися хотящим, наказателю

претихий ленивым, разрешителю тлетворных страстей незлобивый, мужу желаний, прозорливства пророческаго исполнение, предвозгласная цевнице будущих, адаманте веры во Христа несекомый, незыблемый столпе терпения, совершителю заповедий Творца твоего благопослушливый, плотоносный ангеле и Духа Святаго вместилище благовонное, жителю пустынный и бесов прогонителю, исполнителю всех добродетелей смиренномудрый. Небесный человеке и сожителю горним чиноначалием, земный ангеле, кротостию духа кротких землю наследовавый, друже Христов и угодниче Пресвятыя Богородицы, яже и раку цельбоносных мощей твоих во храме своем прославити благоизволи. Яко Мати сущи Творца и Зиждителя всея твари и Хранительница всех труждающихся и обремененных, Тая бо независтно и от раки твоея, преподобне, чудесному дождю на верных изливатися повеле. К нейже припадающе любезно молим тя, досточудне: не престай молити Пресвятую и Живоначальную Троицу, низпослати державе нашей здравие, тишину и долгоденствие, на враги же победу и одоление, и от навет вражиих воинству сохранитися в мире; церквам согласие,

и всем людем тишину, и изобилие благих даровати. И угаси, блаженне, молитвами твоими, парящя на ны разжженныя бесовския стрелы, да не прикоснется нам злоба греховная, и всем вся милостивне даруя, призри и на мя смиренного своего раба: связан бо есмь люте пленицами прегрешений, и влеком, увы мне! в пучину страстного моря неодоержанно. Сего ради прилежно молю святыню твою, пребогате, и припадаю любезно к раце мощей твоих со слезами, предстани мне на пути бедственного жития сего: расторгни узы, отжени страсти, ослаби от греховных вериг, избави мя от належащя скорби и всякаго зла, разреши мя от болезненных уз и спасение даруй, яко да спасся молитвами твоими, воспою и прослаблю в Троице славимаго Единого Бога, Отца и Сына и Святаго Духа, ныне и в безконечные веки веков. Аминь.

